

beamus in votis, quod non habemus in verba [verbis]. Itaque salutatione depensa, quia centum pera [pira] sublimitati vestræ, alia centum fliæ meæ destinare præsumpsi. Quæ si fortasse displicuerint saporis gustu, placebunt, ut confidimus, transmittentis affectu.

## EPIST. LXI.

*Ruricius episcopus fratri a Namacio.*

Saluto plurimum, et spero ut si secundo crastino non potueris, vel tertia feria ad nos venire digneris. Quia desiderio tuæ caritatis accensi, et nos dicimus cum propheta: *Anima mea sicut terra sine aqua tibi. Defecit spiritus meus. Ne avertas faciem tuam* (Psal. cxlii, 6, 7). Ne moreris adventum, ut pectoris nostri, quod parvi temporis solatio suscitasti, exstinguatis incendium. Finit.

## EPIST. LXII.

*Ruricius episcopus filio Vittameno.*

Gratias ago dignantissimæ erga me sublimitati vestræ, quod nos de actibus atque incolumitate vestra, quos nostis, Deo propitio, pro amicitiarum jure sollicitos, facitis litterarum sedulitate securos. Unde his reciprocum reddo nobilitati vestræ salutationis officium, et me has de Decaniaco ad vos dedisse significo, neamque vobis favore divinitatis, quam b vobis placere confido, indicans sospitatem. Præstabit Dominus ut citius hinc regressus vestris merear obtutibus præsentari. Ut cujus benignitate vestra incitatis desideria, visione sollicitetis affectum.

## EPIST. LXIII.

*Ruricius episcopus fratri Claro episcopo.*

Apostolatu vestro pro ea quam mihi non pro meis meritis, sed pro benevolentia animorum vestrorum impenditis, caritate, non dicam vicem non possum repensare beneficiis, sed nec tantas gratias quantas meremini, sermonibus explicare. Impendo tamen per litteras debitum sospitationis officium, partemque

a De eo ad primum librum.

b Ms., vos.

c Fuit Turonensis episcopus, Perpetui successor, postea a Warige Gothorum rege in Hispaniam rele-

gatus, eo quod in Gothorum suspicionem incidisset: autumabant scilicet eum Franci favere. De eo vide plura apud Gregor. Turon. I, 226, lib. x, 31. BARN.

pectoris mei, in quo affectum vestri aviditate suscepi, paginæ colloctione tran-mitto; simulque deprecor ut communi Domino supplicetis ut citius nos faciat fructum de nostra capere præsentia; quosque suæ inspirationis instinctu connexuit, vultum etiam mutua visione conjungat; ut desiderium in nobis quod accendit affatus, restinguat obtutus. De columnis vero gratias ago; et, sicut jussistis, quia modo propter imminem hyemem vehicula illo dirigere non possum, post sanctum Pascha, propitia Divinitate transmittam. De minoribus vero sicut verbo mandastis, si inveniri possunt, mihi vel decem necessarias esse significo. Sed si Dominus prospera universa concesserit, antequam vehicula dirigam ad vos hominem destinabo.

## EPIST. LXIV.

*Ruricius episcopus fratri Volusiano c episcopo.*

Ita quod pejus est, caritatem antiquam, et insitam nobis, partim (quoniam confitendum est) negligentia nostra, partim necessitate temporis, partim corporis infirmitate faciente, longa delebit oblivio, ut penitus immemores nostri facti non solum vos nullis officiis, sed nec litteris requiramus. Miror nobilitatem tuam quasi filium ad me litteras destinare, cum sine ullo respectu religionis aut propinquitatis tibi injuriæ nostræ sic placeant, ut eas vindicare non velis. Unde nisi existimationem personæ meæ, aut officii cogitassetem, portitorem litterarum tuarum talem ad te miseram, quales homines meos non matrona vestra, sed domina procaz et effrenata nimium perduxit; cujus mores si tu tanto tempore cum famæ tuæ diminutione, aut voluntarie aut necessitate supportas, alios noveris nec velle ferre, nec esse contentos. Nam quod scribis, te metu hostium hebetem factum: timere hostem non debet extraneum qui consuevit sustinere domesticum.

gatus, eo quod in Gothorum suspicionem incidisset: autumabant scilicet eum Franci favere. De eo vide plura apud Gregor. Turon. I, 226, lib. x, 31. BARN.

## EPITAPHIUM

RURICIORUM EPISCOPORUM CIVITATIS LEMOVICINÆ.

(Ex Venanti Fortunati lib. iv, carm. 5.)

Invida mors, rapido quamvis miniteris hiatu,  
Non tamen in sanctos jura tenere vales.  
Nam postquam remeans domuit fera tartara Christus,  
Justorum meritis sub pede victa jaces.  
Illic sacra pontificum, toto radiantia mundo,  
Membra sepulcra tegunt; spiritus astra colit.  
Ruricii gemini flores quibus Anniciorum,  
Juncta parentali culmine Roma fuit.  
Accumulante gradus prænomine, sanguine nexi,  
Exsultant pariter hinc anus, inde nepos.

D Tempore quisque suo fundans pia templa patroni,  
Iste Augustini, condidit ille Petri.  
Hic probus, ille pius; hic serius, ille serenus,  
Certantes pariter quis sibi major erit.  
Plurima pauperibus tribuentes divite censu,  
Miserunt cælos, quas sequerentur opes.  
Quos spargente manu redimentes crimina mundi,  
Inter apostolicos credimus esse choros.  
Felices qui sic de nobilitate fugaci  
Mercati, in cælis jura senatus habent.